

26. maj 2022

UKA 2021/167

**Qanoq iliornikkut qitiusumiit eqiterussinerup millisarnera inunnut ataasiakkaanut inuiaqatigiinnullu iluaqutaasinnaanera pillugu apeqquteqaat aallaavigalugu oqallisissiaq.**

(Inatsisartuni ilaasortaq, Aqqalu C. Jerimiassen, Atassut)

Siumumiik oqallissaarummut siunnersuusiortumut qujanaq. Oqallissaarut paasilluarparput, tassami sineriammiilluni, illoqarfimmilu qitiusumiinnani, misiginarsinnaavoq ineriartorneq allaanerusumik ingerlasoq.

Siumumiit pingaartipparput nunarput tamaat ineriartortinneqassasoq aammalu eqiterineq illuatungaani eqiterinnginnissaq assigiinngitsutigut pilersarusiorneqartariaqarpoq aammalu innuttaasunit oqariartuutit tusarnaarluarneqartariaqarlutik. Ilaannili eqiterineq anngiortumik ingerlatsineq siunertaralugu, sipaarutaasinnaasullu eqqarsaatigalugit ingerlanneqartarpoq. Piffinnilumi aamma assigiinngittuni ineriartortitsiuarnissaq pillugu eqiterinnginnissaq pisariaqarsinnaasarluni, naak immaqa aningaasarsiornikkut allaffisornikkullu imminut akilersinnaanngikkaluartoq. Naatsumik oqartoqarsinnaavoq, eqiterineq ajunngittortaarlunilu ajortortaqqarpoq.

Apeqqutaalisoorlu suut eqitikkat siaruarutsigit inuiaqatigiinnut iluaqutaassappat aammalu killormut suut eqiterutsigit inuiaqatigiinnut pitsaanerussua. Tamanna imaaliallaannaq misissuilluaqqaarsimatinnani akiuminaappoq. Oqallisissiaammalli Siumumiit periarfissaasinnaasunik saqqummiilaassaagut, aaligiinerunngitsunik, kisiannili isummersuutissat assigiinngittut.

Siumumiit pingaartipparput aqqissuussinermi nuutsiterianaannarluni nuutsiterisoqassanngittoq. Pisariaqavissumilli aatsaat peqarpat, taamak iliortoqarnissaq sukumiisumik misissuivigeqqaarlugu naliliisoqartassasoq.

Nunarput ineriartorput, mittarfissat Ilulissani, Nuummi, Qaqortumilu assigiinngittunik periarfissanik ammaassapput. RAL nunarsuup sinneranut attaveqaataai aamma piariileruttorput. Iluaqutissartaai niuernikkut assigiinngittutigullu periarfissanik ammaassapput, atorluarumangaanni.

Piffinni aaliangersimasuni periarfissanik nutaanik pilersitserusuttut assut kaammattorumavagut, nutaanimmi pilersitsigutta equngassutsit millisarsinnaavagut.

Siumumiit nunatta tamarmiusup ineriartornissaa pingaartipparput. Suliffeqarfiit nammineq aallartikkusuttut kaammattortuassavagut pilersitsinissaannut. Periarfissat eqqumaariffigineqarsinnaasut nunatta nerisassaataanik atorluaanermiissinnaavoq, atortunnik, nerisassanik tamakkiisumik inerisitaanngittunik tikisitseriarluni nammineq inerisaaneq atorluarneqarsinnaanngorpoq. Soorlu kaffi akitsuutaarunnikuusoq, nammineq sikatsittiviit



assersuutigiinnarlugu pilersinneqarsinnaapput. Takornariaqarneq piorsaneqartariaqarpoq aammalu illoqarfigisami atortut, aqqusernit, takusassat allarpassuillu piareersalereerneqarsinnaapput.

Suna tamarmi nalorninartoqarlunilu pinnaffissaqarpoq. Periarfissalli nammineq ujjartorneqartariaqarput.

Siumumiit isumaqarpugut inuiaat nammineq ingerlatserusuttut piriarfissaqartariaqartut, apeqquttaavorli nammineq piriarfissat suut atorusunneraat. Illuatungaaniik soorunami aamma qitiusumik ingerlatsinermik ingerlataqartut ammaffigissavaat namminersortut arlaannik aallartitserusuttut. Pingaaruteqarpoq aamma inuit namminersorusuttut pisortat akilersugaannik ingerlatsisut namminersortunik ipititsisannginnissaat. Tapiissuterpassuarnimmi pisarput, taakkualu sillimmasiullugit suliffeqarfippassuarnik pisiortulersinnaasarlutik imaluunni unammillerneq equngasoq aallartissinnaasarluni.

Aningaasaqarnermut inatsimmi katillugit 28 mio. missaani illikartinneqarsimapput suliffeqarfinnik pilersitsinissamut tapiissutaasinnaasutut. Tamakkua niuertut, aallartitsirusuttullu eqqummaarifiginissaanut aamma Siumumiik kaammattuissaagut.

Siumumiik taamatut oqaaseqarluta neriuppugut oqallittoqarluarumaartoq.

Kuno Fencker, Siumut.